

王照·盧愨章·勞乃宣·吳敬恒

周邦道

當代教育先進傳之六

王照 (1859—1933)

王照，字小航，一號蘆中窮士，晚以字行，河北寧河人。曾祖錫朋，清壽春鎮總兵，鴉片戰作，英人犯定海，戰沒，諡剛節，贈世職。照咸豐九年己未某月日生。幼失怙，光緒三年，十九歲，入邑庠；三十三歲，中鄉舉；三十六歲，成進士，入翰林。甲午之役，歸縣練鄉團，紀律嚴明；直隸總督王文韶，頗嘉異之，奏准飭飭各州縣仿行。未幾，罷其事。二十三年丁酉，創立小學堂於蘆台，此為州縣地方設學校之始。驗年戊戌，供職京師，與徐世昌、李煜瀛等創立「八旗奉直第一號小學堂」，是即畿輔中學、燕冀中學之前身也。

時，德宗厲行新政，照以部員應詔上書言事，禮部漢尚書許應騷，格不代奏，月餘，照面責抗旨，應騷羞憤參劾帝怒，革軍禮部堂官六人。嘉照勇猛，超擢四品京堂候補，賞三品頂戴，豫擬繼黃遵憲使日。旋政變，東渡，亡命。在此期

間，照首創「官話字母」，定北京話為公用之官話，以北至黑龍江，西踰太行、宛、洛，南距揚子江，東傳於海，縱橫數千里，皆與京話略通，故選擇此幅員最廣之話，而為全國統一之標準語言也。既而以僧服潛行歸國，二十六年庚子冬，始刊所著「官話合聲字母」於天津，凡五十聲母，自署蘆中窮士。漫遊吳、楚，後蟄居津門，專事研究官話字母，期啓迪民智。

次年辛丑，赴京謁李鴻章，于式枚代見。式枚憂固同寮，前後同舉進士。照慷慨陳辭，謂中國欲自強，非注重基層教育不可，欲去其障礙，非溝通語文使其合一不可。惜兩意參商，不契而別。二十八年壬寅，兩宮回京，太后仍銜黨人。

癸卯，照適在京，與沈蕤交，蕤新黨譚嗣同友，被逮，杖斃刑部獄；照慮不免，投案自首。帝許免死，乃交刑部，永遠監禁。旋遇赦出獄，遂不復仕。於是赴保定，創設官話書報社。丙午，遷京刊字母書報，流傳甚廣。因曲意承順，后怒漸解。袁世凱素主推行官話字母，且廣播於北洋

遼瀋及江南，欲見照。照以其背帝附后，終不往謁。嚴修謂張一麐曰：「袁項城獨能極端贊成官話字母，而張南皮自命大教育家，反格格不入何也？得非受文毒過深之故乎？」照歎為知言。

庚戌，觸攝政王載灃之忌，社復被封，嚴禁傳習官話字母，乃避之江蘇。宣統間，學部亦不喜言字母或簡字，幸勞乃宣以宿學純儒，通變鼓吹，學部亦無如之何也。民國二年，教育部聘為讀音統一會會員。次長代理部務董鴻楫優禮有加，勸晉調大總統，照峻拒不往。及開會，被舉為副會長，與議長吳敬恒議不合，不久，拂袖而去。段祺瑞當國，延入幕中。旋隱居，築室德勝門內馬家大院，名曰水東草堂，故晚年常自署水東。二十二年癸酉六月一日卒，年七十有四。兄燮，襲世職，拳亂被戕。弟焯，進士，先照卒，子某，北京大學生。

照為振奇人，有膽識，有恒心，特立獨行，真固骨硬。一生事業，端在創行官話字母，設立學校及拼音官話書報社。吳汝綸、江謙、嚴修、

袁世凱、周馥、趙爾巽、勞乃宣、吳敬恒、王璞等，多力予贊揚。三十年間，國語運動，分道揚鑣，紆迴曲折，而卒歸趨於「小航路線」，照亦可謂先知先覺者矣。生平著作，有：官話合聲字母：官話字母字彙，官話字母義塾叢刊、小航文存、三體石經時代辨誤，讀左隨筆，讀易隨筆，表章先正正論，方家園雜詠記事等書行世。

(本黎錦熙：王照傳、光宣語運史略、王小航先生遺書簡目。)

盧憲章 (1854—1928)

盧憲章，字雪樵，福建同安人。生於清咸豐四年甲寅某月日。十八歲，應試不售，為塾師三年。二十一歲，往新加坡，專學英文。二十五歲，回廈門，就英教士馬約翰聘，助譯英華字典。當時廈門一帶傳教西人，已以羅馬字母，創行一種「話音字」，用漳泉「十五音」，拼切土音土話，刊行聖經。憲章就此種字，悉心研究，歷十餘年。以廈門音三十六字為主，而增加漳、泉及汕頭、福州、廣東等處總腔，選定總字母(韻母)及總韻脚(聲母)，共計五十五字；以字拼音，代替漢字，製成羅馬字式之字母，橫行拼寫，兩音以上之詞，則用連號，定名為「中國第一快切音新字」。時光緒十八年壬辰，年方三十九歲也。

是年所編切音新字課本，名「一目了然初階」(中國切音新字廈腔)，次年編行一種節本，名「新字初階廈腔」，均係木刻板。因其簡易，「祇須半載，便能持筆抒寫其所欲言」，故頗風

行。二十四年戊戌，有同鄉安溪林翰存者，官工部虞衡司郎中，贊佩其法，為呈都察院，請代上奏，除特別揄揚憲章外，兼舉各有簡明字學行世之福建舉人力捷三、江蘇上海沈學、廣東香港王炳耀、漢海關道蔡錫勇等四人。奏達，軍機大臣面奉上諭：「著總理各國事務衙門，調取盧憲章等所著之書，詳加考驗具奏。」適康、梁失敗，一切新政停頓，臺灣總督日人兒玉，禮聘憲章為辦理學務課事，因新字運動，無從進行，三年即辭職。

此時對於切音新字之形式，意見大變，願放棄羅馬字母舊制，而改採漢字點畫偏旁。名聲母曰「聲音」，韻母曰「字母」，計「聲音」二十五個，「字母」百零二個。切音方法，以「字母」為經，「聲音」為緯。三十一年，從廈門跋涉入京，資所著「中國切音字典」，遵七年前諭旨，請求考驗。因機關職掌改易，稽延年餘，始展轉由外務部依據學部譯學館文典處之意見，批駁其疏謬：一為聲母不完全，二為韻母無入聲，三為先韻母而後聲母，寫法乖謬，與古今中外通例相背馳也。

憲章受此打擊，乃改向社會宣傳，在上海石印「北京切音教科書」首集、貳集，「中國字母北京切音合訂」、內凡八種。此時國語運動，進入第二期，王照之「官話字母」，已推行京、津、寧、奉一帶。憲章堅持己見，不若勞乃宣之肯與合作。書端每標列林季商所贈聯云：「卅年用盡心機，特為同胞開慧眼；一旦創成字母，願教吾國進文明。是即其平生志事之寫照也。

民國元年，福建選派為教育部讀音統一會會員，次年會議，決定注音字母三十九個。憲章獨不謂然，以為不如己所創者之簡明淺易。歸而改「切音字母」為「國語字母」，時年已六十。越二年，編印「中國新字」，聲母改為「字音」，韻母照舊。仍綴以前聯語，將「卅」改為「卅」，蓋其致力至此已近四十載也。未幾，又編「中華新字」三冊，一為國語通俗教科書，二為漳泉語通俗教科書。因用三字母切一字之音，素極反對，故不願用注音字母。輒自製就兩口號，曰：「多母切音，畫蛇添足」；「單母成字，盧醫仙丹」。

民國九年，應福建陳總司令炯明聘，在漳州教授注音字母，此時於注音字母已不甚反對，且計畫添製廈漳泉用之閩音字母。國語統一籌備委員會主席吳敬恒與以函云：「先生為首創音字之元祖，雖注音字母筆畫未依尊製，而先生不朽之心思，仍屬於注音字母之中。今之溯源流者，必舉其大名；是千秋之業，不必在形迹間存矣。」又云：「閩南方音字母非先生不能製」。其推重可知已。

爾後，果編印「注音字母課本」一大張，又製成閩南閩音，名曰「閩南語注音字母」，及「盧憲章中華新字字母，羅馬字母對照表」。因其不忘情於己所發明，故作表以比較焉。憲章為從事切音運動之第一人，對於國語教育之推進，彌多獻替。稱為「音字元祖」、「國語運動的急先鋒」、「算路藍縷，以啓山林之元勳」，(白滌洲文)自可當之而無愧色也。民國十七年十

二月二十八日卒，年七十有五。子天福、早殤，女天德、天恩、天喜，嗣孫大鵬。

(本白滌洲：介紹國語運動的急先鋒——盧愷章，黎錦熙：盧愷章先生傳。)

勞乃宣(1843—1921)

勞乃宣，字季瑄，號玉初，別署矩齋，晚號韜叟，浙江桐鄉人。清道光二十三年癸卯某月日生。同治四年中鄉試，十年成進士。先後補直隸、南皮、完縣、吳橋知縣，又攝篆臨榆、蠡縣、及清苑，兼保定府同知。勤政愛民，屢薦卓異。任吳橋最久，重興蓮池書院，廣設里塾，與學阜農，民戴其德。會義和團亂作，既剿滅其黨羽，復直言上疏請禁，卒以是去官。初，浙江已設求是書院，兼講西學。至是，南歸居杭，總理陸懋勳延為監院，旋繼任總理。已而詔改書院為求是大學堂，旋改為浙江大學堂，浙江高等學堂，先後任監督凡三年，施教以經義為主，中外政治諸藝為輔，學生翕然悅服。

光緒三十三年，因大臣薦，入覲，以四品京堂候補，任憲政編查館參議。宣統改元，選資政院碩學通儒議員；理藩部諮議官。以新刑律多與倫常抵違，爭之甚力。既而調江寧提學使，復以資政院開會應召入京，在法制院參預外省官制。尋授京師大學堂總監督，兼署學部副大臣。力主文字應簡化改革，嘗與趙筮園等在京設簡字研究會。清帝遜位，退隱涑水。時德國學者備禮賢，設禮賢書院於青島，創魯孔文社，招乃宣往主其事，相與研討中國學術。袁世凱任總統，聘為參政

院參政，固辭不就。民國六年，張勳擁溥儀復辟，任偽法部尚書。事敗，復遷居青島。自以及事清室，不改其節；顧躬與復辟，豈非共和；盛名之玷，識者歎焉。十年六月，在青島卒，年七十有九，葬於蘇州。

乃宣博通經史性理禮制刑法曆算教育，於算學尤有特嗜，因悟九章皆為籌法，卒能闡明，使千古良法，湮而復彰。嗣寧河王照創官話合聲字母，定五十母十二韻及四聲之號。設學堂及書報社於京津保定，以是推播於直、魯、晉、與東三省。乃宣以中國文字精深，僅能教秀民，不能教凡民，故於王氏之法，深致推挹。惟其字母，悉本京音，於南音頗有未備，因與諸同志考訂商榷，修改王之字母，定名合聲簡字。增六母三韻及一入聲之號，俾攝江寧附近及皖省等處之音。後復增七母三韻及一濁音之號，則蘇州近屬並浙省語言比鄰諸處皆能通行。時方佐兩江總督周玉山、魏幕，因切陳簡字之要，請准創設簡字學堂於江寧。浙江藏書樓監理楊復，亦設簡字講習所於杭州，則服膺其說而響應者也。乃宣既創簡字以教人，復先後編著簡字書籍，梓以行世。民國以來，教育部釐定注音符號，推行全國，於語言之統一，頗奏偉績。推源究始，則王、勞二氏，實導夫先路也。

乃宣所編著，計有：簡字全譜，京音簡字述略，增訂合音簡字譜，重訂合聲簡字譜，讀音簡字通譜等，凡五種。自籌算，七種。此外，有紀義和團案，紀新刑律案，諸書。又主編各國約章纂要，襄纂畿輔通志，校補清續文獻通考，均足

傳世。平生尊古崇道，篤實踐履，持躬凜然，誦服儒先，跬步不苟，隱然若承鄉賢張楊園之遺緒云。

(本陳訓慈：勞乃宣傳略，及桐鄉勞玉初先生小傳。)

吳敬恒(1865—1953)

吳敬恒，原名眺，字稚暉，別號拙齋，晚自稱拙齋老人，江蘇武進人。清同治四年乙丑二月二十八日生。六歲喪母，育於外家無錫鄒氏。外祖母陳，愛之篤而教之嚴。自幼天資穎異，頭角嶄然。七歲入塾，十八即開始教讀。二十三歲，入縣學，二十五歲，入江陰南菁書院。二十七歲，辛卯科鄉試中式。二十八歲，入京會試，試卷經「堂備」而未中。試罷，仍回南菁。山長定海史學大師黃以周，有座右銘曰：「實事求是，莫作調人」。敬恒深受影響，終身服膺弗渝。甲午中日戰後，乃棄科舉，赴天津，任北洋學堂教習。戊戌南歸，應上海南洋公學之聘，任國文教習，改任學長。抨擊清政，為當局所忌，光緒二十七年辛丑，赴日留學。

時 國父孫先生初至橫濱，鈕永建力勸晉謁，而素性剛介，不輕許時人，以是未即往。後三日，國父見訪於明凌館，敬恒始衷心傾服。嘗謂 國父「品格自然偉大，度量自然寬宏，精神自然專一，研究自然淵博。」寥寥數語，實為對國父觀察最深，崇仰至篤之論。二十八年壬寅，入東京宏文師範，清廷駐日公使蔡鈞，拒不保送蔡錫，吳暮良等入成城學校，敬恒率留日學生

坐公使館抗爭，蔡報警驅逐出境，憤而投水，遇救，得不死。蔡元培時亦在日，聞訊，亟護送同歸。五月回上海，十月組愛國學社，嗣辦蘇報鼓吹革命。清廷指名密拿，遂走香港，轉赴倫敦。三十一年乙巳，國父至倫敦，張人傑亦自法抵英。是年，敬恒赴巴黎，入同盟會，並與張人傑、李煜瀛組織世界社。生平傾心無政府主義，惟以三民主義為實現無政府之階梯，故於國父及同盟會之信仰益堅。時又致力於科學運動，所著「上下古今談」，辛亥出版，不僅使國人知科學為何物，且指導青年建立科學之人生觀。後復著「天演學圖解」及「荒古原人史」，皆所以教導國人開拓胸襟，放寬眼界，向科學時代邁進。

民國肇建，往來寧滬間，協贊國事。北京政府成立，蔡元培任教育總長；北上，應邀推行國語注音字母工作。次年，國語讀音統一會開會，舉敬恒為議長。民二，蔡辭職，相偕返滬。二次革命失敗，再回蔡赴歐。四年，袁稱帝，與李煜瀛等組織世界編輯社，又發起留法勤工儉學會，貧窶學生得以求學者踵接。五年，袁死，回國，任上海中華日報主筆。六年蔡元培任北京大學校長，聘為學監，辭未就。七月，范源濂任教育總長，撥款請其編注音字典。乃審定一萬三千餘字，交商務印書館於八年九月出版。九年，西南海外大學之議成立，赴法視察里昂中法大學校舍。十年，回國招生，率學生一百餘人赴法，任里大校長。十一年，陳炯明叛變。於次年回國，勸陳悔過討賊，不聽。十三年，出席中國國民黨第一次全國代表大會，被選為中央監察委員，嗣後

歷屆當選連任。十四年，國父逝世，簽字於遺囑，並參與治喪，扶柩移靈。旋在北京小南街創辦海外補習學校，國民黨人子弟，就讀者甚多。十五年六月，蔣公受任為國民革命總司令，誓師北伐，代表中央受旗。再受教育部聘，擔任國語統一籌備委員會主席，積極提倡注音識字運動，對於教育之普及與國語之統一，有莫大之貢獻。今中華民國國民及海外僑胞，不僅書同文，亦且語同音，皆敬恒領導之力也。十六年，國民政府定都南京，鑒於共黨逆謀日著，乃毅然向中央倡議清黨。十七年，推長監察院，未得同意。二十六年七月，蘆溝橋事變發生，力贊蔣公領導抗戰。政府西遷重慶，住上清寺，室至簡陋。中央為築小樓於國民政府之側，拒不遷居。三十二年八月，國民政府主席林森逝世，中央擬推繼任，亦堅辭不允。蔣公之於敬恒，備極尊崇，常稱「吳先生」而不名。國家遭變局，每驅車就教，必得一言，而信心始堅。北伐、抗戰，以至播遷、戡亂時期，莫不皆然。身如閒雲野鶴，而關繫黨國安危如此。

三十五年，制憲國民大會，及三十七年第一屆國民大會，皆參加，並選為主席團主席。三十八年二月，總統蔣公特派飛機至上海迎接，展轉來臺。三十九年三月，蔣公復行視事，被任總統府資政。旋又選為中央評議委員。年事雖高，猶從事史學。文字學之研究。嘗繪共黨禍國殃民圖，以警惕人心，喚醒國魂。生平自奉儉樸，出則徒步，居則陋室，敝衣敗絮，安之若素。演說莊諧雜出，聞者每為粲然。晚年攝護腺閉塞，

四十二年七月，醫院診斷為膀胱結石症。十月中旬動手術，三十日竟卒，年八十有九。十二月一日，遵其遺囑火化，海葬金門，情懷悲壯。著作甚多，國史館將為編印「吳稚暉先生全集」。總統明令褒揚，謂敬恒為：「開國元良，多士師表，淹中西之學，究天人之道。秉浩然之氣，為振奇之人。其對國音統一之貢獻，實奠民族文化之宏基。於思想則兼沉潛高明。於國家危難之際，則常定大計，決大疑於機先，高風碩德，允為一代完人」。信矣！

中外人物專輯(一)

汪公紀等著·定價叁拾元

中外人物專輯(二)

雷嘯岑等著·定價叁拾元

中外人物專輯(三)

王培堯等著·定價叁拾元

中外人物專輯(四)

顏景胡等著·定價叁拾元

中外人物專輯(五)

李先聞等著·定價叁拾元

中外人物專輯(六)

胡耐安等著·定價叁拾元

郵檢一四〇四四號中外雜誌社